



Bentiaraq Ottosen

UPA 2026/73

Atassut

17. Juni 2026

Nunatsinni piniartut aalisartullu inuuniutaat eqqarsaatigalugu piniakkanut aalisakkanullu ulluliisarnelit ullutsinnut naleqquttuunersut pillugit oqallisissiatut siunnersuut

(Inatsisartunut ilaasortaq Gerth Mikaelen, Naleraq)

Siullermik Gerth Mikaelen Naleraq oqallisissiatut saqqummiussaanut qujanaq.

Kalaallit Nunaanni aalisarnikkut piniarnikkullu inuiaqatigiinni inuussutissarsiorneq pingaaruteqarluinnartuusoq Atassummiit oqariartuutigerusupparput, tamanna piorsarsimassutsikkut aammalu oqaluttuarisaanitsinni qitiulluinnartut ilagaat. Ukiuni utritilinni piniartut aalisartullu inuiaqatigiinnut pilersueqataasimapput, nunattalu aningaasarsiornerannut tunggavigissaarlutik pingaarutilimmik inissisimapput. Taamaattumik aalisarnikkut piniarnikkullu tunggatillugu inatsisiliornerit malittarisassallu inuiaqatigiinnut annertuumik sunniuteqartarput, taamaattumik Atassummiit isumaqarpugut aalisarnikkut piniarnikkullu sunniutaasartut pitsannerpaamik inuiaqatigiinni sunniuteqarluartarnissaat.

Atassutip politikikkut naleqartitaasa ilagaat kiffaangissuseq, akisussaassuseqarneq, inuussutissarsiornermik ineriartortitsineq aammalu innutaasut aalajangiinerni peqataatilluinnarneqarnissaat. Taamaattumik naleqqussaajuarnissarput ulluliisarnernit oqallisigilluariatariaqarpagut, inuussutissarsiortut tusarnaarneqartariaqartut aammalu oqallinnerni aalajangiinerit qitiusumit kisimi aalajangersarneqartassanngitsut isumaqarluta.

Ullumikkut piniarsinnaanermut uumasut pineqartut aammalu aalisarsinnaanermut pisassat tunniunneqartartut amerlanertigut biologit innersuussutaat imaluuniit siunnersuisarnerat, pissutsinut nalimmassaataasartut eqqarsaatigalugit pisuussutit amerlassusaat aammalu piujujuartitsinissaq tunggavigalugit aalajangersarneqartarput. Tamanna pingaaruteqarpoq, pisuussutit nungusaataanngitsumik atorneqarnissaat qulakkeerneqassammat. Tamanna Atassutip isiginnittaasia malillugu isumaqarpoq atuisuusut aammalu aalisartut tamatumingga tusarnaarnerullugit aalisarnikkut ingerlatsinissaq pingaaruteqartuusoq, peqassuseq aallaavigiinarnagu kisianni tusarnaarnerunissarput aalisartunut pingaarnerummat. Atassut aamma isumaqarpoq pinngortitap pisuussutai paarilluinnartariaqarigut, taamaalilluni kinguaariit tulliuuttut aamma periarfissaqarlutik inuussutissarsiorsinnaaqullugit.

Kisianni Atassutip tungaanit apeqqut saqqummiunneqarsinnaasoq tassaavoq: ulluliussat aalajangersarneqartartut tamarmik nunatsinni naleqquttuunersut? Ukiuni kingullerni silap pissusiata allanngoriartornera malunnaateqaleraluttuinnarpoq. Siku siusinnerusukkut angallavigiuminarnerpaavoq, maanakkullu kaangartarnera sukkanerujussuuvoq. Immap kissassusaa



kissarnerugaluttuinnarpoq, aalisagaqassuserli apeqqutaalluinnalerpoq qanoq sivisutigisinnaanera. Maannakkut saarulleqassuseq imartatsinni kangerlunnillu annertuseriarpoq, sumiiffinni annertunerpaami. Arnarluillu sumiiffiit ilaani ajornarnerulerput, ilaatigulli annertunerullutik. Rejeqassuseq ukiuni tullerni annikilligaluttuinnavippoq, nunattalu aningaasarsiutigilluugaat silap pissusiata allanngoriartorneranut eqqorneqarpoq. Taamaattumik malittarisassat imaluuniit nalunaarutit ukiut arlallit matuma sionratigut aalajangersarneqartartut ullumikkut piviusunut naappertuunerat apeqqutit annersaraat. Aalisagaq piniagassallu siulitta ilisimalluugaat tammartarlutik takkuteqqittarmata.

Atassut isumaqarpoq piniartut aalisartullu ilisimasaat immikkut pingaaruteqartuusut. Inuussutissarsiortut taakku ullut tamaasa imaani, sikumi nunamilu sulisarput, taamaattumik allannguutit siulliullutik malugisaraat oqaatigisinnaavarput. Atassummiit pingaaruteqarpoq aalajangiinerit ilisimatuussutsikkut paasissutissani tungaveqarluinnarnissaat pingaaruteqartoq, saniatigulli pingaaruteqarpoq aamma piniartut aalisartullu misilittagaat naligiimmik pingaaruteqartariaqartut. Atassutip isiginnittaasia naapertorlugu politikkikkut aalajangiinerit pitsaanagerusut anguneqartariaqartut, susassaqtartut tamarmik peqataatinneqarpata.

Atassut inuussutissarsiornermik ineriartortitsinermik pingaaritsisuuvoq. Nunatsinni inoqarfiit annerit aammalu inoqarfiit minnerit amerlasuut aalisarnermik piniarnermillu toqqammaveqartut tusarnaarnissaat. Nalunaarutit killilersuutitulluuniit misigineqaraangata, inuussutissarsiortut isertitaat, suliffissaat aammalu sumiiffinni nunap immikkoortuini ineriartortitsinikkut sunnerneqartarnerat politikkikkut nalilersuiffiguarnissaat oqallisiguarnissaat pingaartippaa. Taamaattumik Atassut isumaqarpoq killilersuutit pisariaqartinneqartut aalisarnikkut piniarnikkullu piujuuartitsinikkut atorneqartuassasut, malugalugu piniagassat aalisakkallu aamma illersorneqartuarnissaat inuussutissarsiornikkullu piujuarnissaat pineqarmata. Kisianni pisariaqanngitsumik aporfiliiniaanarluni aporfilersuisoqassanngilaq. Inuussutissarsiortut namminersorlutik ingerlatsisut periarfissaqartuarnissaat pingaaruteqarmat suliffeqarfiit aammalu nunami suliffissaqartitsineq ineriartortinneqartuarnissaanut toqqammaviliisuummata.

Atassut aamma isumaqarpoq oqartussat inuussutissarsiortut akornanni tatigeqatigiinnerat annertunerusariaqartoq. Piniartut aalisartullu amerlasuut misigisimasarput aalajangiinerit ilaanni tusaaniarneqarneq ajortut, taamaattumik Atassutip pingaartilluinnarpaa ingerlatsinermi ammasumik oqaloqatigiinnerit, tusarniaanerit ingerlanneqartarnissaat pitsaasut tungaanut eqqarsarluni sumiiffinni innutaasut peqataatilluinnarneqassasut. Taamaaliornikkut innuttaasut killiliussanik paasinninnerullutik aammalu aalajangersaanerni pitsaanagerusumik tungavissaqalersinneqassammata.

Kiisalu Atassutip politikia tungavigalugu pingaaruteqarpoq, nunatsinni pisuussutivut innuttaasunut iluaqutaassasut. Aalisarnerq piniarnerlu aningaasarsiornikkut pingaaruteqartutut inissisimmata, taamaattumik ilusilersuinerit pitsaasut inuussutissarsiornikkut siuarsaataasumik, suliffissanik pilersitsillutik aammalu inuiaqatigiinnut pitsaasumik atugarissaarnikkut



isertitaqaataalluartumik aningaasaqarnikkut patajaatsuunerulernermik kinguneqarnissaa qulakkeerneqassamat.

Atassutip naleqartitai tunngavigalugit aalisarnikkut piniarnikkullu ulluliisarnarit pingaaruteqartuusut oqariartuutigaa, kisianni aalajangersakkat ingerlaavartumik nalilersorneqartarnissaat siunissami kissaatigaa. Silap pissusiata allanngoriartornera, piniartut aalisartullu misilittagaat kiisalu biologit siunnersuinerat ataatsimoortillugit atorneqarsinnaasariaqarnerat ersarinnerulernissaa pingaartuusooq oqariartuutigaarput. Atassut isumaqarpoq kiffaangissuseq, akisussaassuseqarneq aammalu inuussutissarnermik ineriartortitsineq piujuartitsinerlu oqimaaqatigiisinneqarsinnaasariaqartut, taamaalilluni nunatsinni aalisarneq piniarnerlu siunissami nukittuumik ingerlaqqissinnaanngusaaq. Oqallisigineqartiariaqartorlu ulluliussat atuuttut ullutsinnut naleqqunnersut, imaluuniit inuussutissarsiortut pisariartitaannut pitsaanerusemik naleqqussartariaqarnersut.

Qujanaq oqallinnermut.